

Nota Kata Penguat

Menurut Tatabahasa Dewan, kata penguat ialah perkataan yang mendahului atau mengikuti kata adjektif dan berfungsi menguatkan maksud yang terkandung dalam kata adjektif tersebut.

Fungsi Kata Penguat

- Menguatkan makna kata adjektif atau frasa adjektif.
- Menambah penekanan dalam ayat supaya maksud lebih jelas .

Jenis-jenis Kata Penguat

Kata penguat terbahagi kepada tiga jenis utama berdasarkan kedudukannya dalam frasa adjektif:

1. Kata Penguat Hadapan

- a. Terletak di hadapan kata adjektif.
- b. Contoh: *terlalu, paling, agak, cukup, makin, kurang*
- c. Contoh ayat: "Pokok itu **terlalu** tinggi".

2. Kata Penguat Belakang

- a. Terletak di belakang kata adjektif.
- b. Contoh: *sekali, benar, betul, nian*
- c. Contoh ayat: "Kelakuan budak itu baik **sekali**".

3. Kata Penguat Bebas

- a. Boleh berada di hadapan atau belakang kata adjektif.
- b. Contoh: *sangat, sungguh, amat*
- c. Contoh ayat: "**Amat** merdu suara si Zalika" / "Suara Zalika merdu **amat**"



Contoh Kata Penguat dan Penggunaannya

Jenis Kata Penguat	Contoh Kata Penguat	Contoh Ayat
Hadapan	terlalu, paling, agak, cukup	Amir merupakan pelajar paling tinggi dalam kelas itu.
Belakang	sekali, benar, nian	Indah sekali pemandangan laut ini
Bebas (hadapan/belakang)	sangat, sungguh, amat	Suaranya sungguh merdu/ Merdu sungguh suaranya

Kesilapan Umum

Salah satu kesilapan yang sering terjadi melibatkan kata penguat ini adalah apabila ia digunakan dengan kata adjektif yang telah menerima imbuhan ter- seperti contoh di bawah:

Ayat	Status Ayat
Bangunan itu merupakan bangunan paling tertinggi di Malaysia.	Salah
Bangunan itu merupakan bangunan tertinggi di Malaysia	Betul
Bangunan itu merupakan bangunan paling tinggi di Malaysia	Betul



Kesilapan yang lain adalah menggunakan dua kata penguat sekali gus bagi kata adjektif dalam ayat seperti contoh:

Ayat	Status Ayat
Sambutan hari guru pada tahun ini diraikan cukup meriah benar daripada tahun sebelumnya.	Salah
Sambutan hari guru pada tahun ini diraikan cukup meriah daripada tahun sebelumnya.	Betul
Sambutan hari guru pada tahun ini diraikan meriah benar daripada tahun sebelumnya.	Betul

Kesalahan ini berlaku kerana, penggunaan kata penguat seperti "**sekali**," "**benar**," dan "**nian**" tidak boleh berulang kerana ia hanya berfungsi sebagai penguat tambahan setelah kata adjektif.

